

Kes rasuah projek bina lebuh raya di Perak, Kedah

Abdul Latif dilepas tanpa bebas

Kuala Lumpur: Mahkamah Sesyen di sini, semalam, melepaskan tanpa membebaskan Datuk Abdul Latif Abdul Rahim, abang kepada bekas Pengerusi Tabung Haji, Datuk Seri Abdul Azeez, daripada dua pertuduhan bersubahat dengan adiknya itu menerima rasuah membabitkan projek pembinaan lebuh raya dan naik taraf jalan raya di Perak serta Kedah.

Timbalan Pendakwa Raya Adam Mohamed, berkata Hakim Azura Alwi membuat keputusan itu selepas pihaknya memohon Abdul Latif dilepas tanpa dibebaskan daripada pertuduhan itu dengan menjadikannya saksi pendakwaan.

“Jabatan Peguam Negara (AGC) mempertimbangkan permohonan pihak pembelaan untuk menggugurkan pertuduhan ke atas Abdul Latif selepas dua representasi diserahkan kepada AGC tiga bulan lalu.

“Jadi, pihak kami memohon untuk melepas tanpa membebaskan tertuduh (Abdul Latif) daripada pertuduhan ini. Mahkamah kemudian membenarkan permohonan itu,” katanya ketika


dihubungi media, semalam.

Perbicaraan kes Abdul Azeez dan abangnya itu sepatutnya bersambung semalam di hadapan Azura.

Adam berkata, perbicaraan kes yang dijadualkan berlangsung semalam hingga Rabu dilayangkan selepas pihaknya memaklumkan Hakim Mahkamah Tinggi, Datuk Muhammad Jamil Hussin membenarkan permohonan Abdul Azeez untuk menangguhkan perbicaraan sementara menunggu permohonannya bagi membatalkan tiga pertuduhan rasuah dan 10 pertuduhan pengubahan wang haram dihadapinya didengar pada 23 Februari ini.

Katanya, Abdul Azeez tidak hadir pada prosiding semalam dan peguam Hisyam Teh Poh Teik yang mewakilinya mengemukakan sijil sakit tertuduh dari 5 hingga 11 Februari.

Sementara itu, peguam Datuk Seri Jahaberdeen Mohamed Yunoos yang mewakili Abdul Latif berkata, pihaknya memohon anak guamnya dilepaskan dan dibebaskan daripada dua pertuduhan itu jika pihak pendakwaan tidak mahu



Abdul Latif Abdul Rahim

meneruskan pendakwaan.

“Sepatutnya anak guam saya dilepas dan dibebaskan kerana ia tidak adil dan dia akan fikir pendakwaan akan menuduhnya semula jika dia tidak dibebaskan daripada pertuduhan itu,” katanya.

Abdul Azeez, 54, yang juga Ahli Parlimen Baling menghadapi tiga pertuduhan menerima rasuah RM5.2 juta berkaitan projek jalan raya di Perak dan Kedah serta 10 pertuduhan pengubahan wang haram.

Pertuduhan rasuah itu didakwa dilakukan di Bank CIMB cawangan Menara UAB, Jalan Tun Perak, di sini pada 8 Disember

2010 dan di Affin Bank Berhad, Setiawalk, Persiaran Wawasan, Pusat Bandar Puchong di Petaling, Selangor pada 13 Jun 2017 serta 10 April 2018.

Bagi pertuduhan pengubahan wang haram, Abdul Azeez didakwa melakukan kesalahan itu di Lembah Klang antara 8 Mac 2010 hingga 30 Ogos 2018.

Abangnya, Abdul Latif, 63, didakwa atas dua pertuduhan bersubahat dengan Abdul Azeez yang didakwa menerima RM4 juta daripada Mohammad Redzuan Mohanan Abdullah sebagai upah membantu syarikat Menuju Asas Sdn Bhd mendapatkan projek jalan raya secara tender terhadap Kementerian Kerja Raya.

Projek itu membabitkan Lebuh raya Persisiran Pantai Baru dan kerja menaik taraf Jalan Persekutuan FT005 (Teluk Intan ke Kampung Lekir, Perak) bernilai RM644,480,000.

Kedua-dua kesalahan itu didakwa dilakukan di Affin Bank Berhad, Setiawalk, Persiaran Wawasan, Pusat Bandar Puchong, Petaling, Selangor antara 13 Jun 2017 hingga 10 April 2018.

BERNAMA